

VENDIM
Nr. 699, datë 26.8.2015

**PËR LICENCIMIN E INSTITUCIONIT TË ARSIMIT TË LARTË, PRIVAT, ME
STATUSIN E KOLEGJIT PROFESIONAL, “KOLEGJI PROFESIONAL I TIRANËS”,
TIRANË**

Në mbështetje të nenit 100 të Kushtetutës dhe të neneve 4, pikat 4, 7, 43, 44, 44/1 dhe 45, të ligjit nr. 9741, datë 21.5.2007, “Për arsimin e lartë në Republikën e Shqipërisë”, të ndryshuar, me propozimin e ministrit të Arsimit dhe Sportit, Këshilli i Ministrave

VENDOSI:

1. Licencimin e institucionit të arsimit të lartë, privat, me statusin e kolegjit profesional, “Kolegji Profesional i Tiranës”, në emër të shoqërisë “KPT”, sh.p.k., i cili do të ushtrojë veprimtarinë e tij në qytetin e Tiranës.

2. Kolegji Profesional i Tiranës do të organizohet në tri departamente:

- Departamenti i Teknologjisë së Informacionit;
- Departamenti i Elektro-Mekanikës;
- Departamenti i Ndërtimit dhe Sistemeve të Aplikuara.

3. Kolegji Profesional i Tiranës do të ofrojë programe të studimeve jouniversitare, profesionale, pas arsimit të mesëm, me kohë të plotë, në këto drejtime:

- Teknologji informacioni dhe komunikimi;
- Elektronikë;
- *Database dhe web design*;
- Elektro-mekanikë;
- Teknologji automjetesh;
- Mekatronikë;
- Teknologji ajrimi dhe kondicionimi;
- Gjeodezi;
- Teknologji ndërtimi.

4. Programet e studimit jouniversitare, profesionale, të parashikuara në pikën 3, të këtij vendimi, realizohen me 120 kredite. Kohëzgjatja normale e këtyre programeve do të jetë 2 vite akademike (4 semestra) dhe në përfundim të tyre do të lëshohet “Diplomë profesionale” në fushën e arsimimit të kryer.

5. Kolegji Profesional i Tiranës do të organizohet dhe do të ushtrojë veprimtarinë e tij sipas ligjit për arsimin e lartë dhe akteve nënligjore në zbatim të tij.

6. Kolegji Profesional i Tiranës duhet t'i nënshtrohet procesit të akreditimit institucional dhe të programeve të studimit, brenda afateve të përcaktuara në aktet ligjore dhe nënligjore në fuqi.

7. Ngarkohet Ministria e Arsimit dhe Sportit dhe Inspektorati Shtetëror për Arsimin për kontrollin periodik të ligjshmërisë në institucion.

8. Ngarkohen Ministria e Arsimit dhe Sportit dhe kolegji profesional, privat, “Kolegji Profesional i Tiranës” për ndjekjen e zbatimit të këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama